

豫章叢書

第七〇冊



揭文安公文集卷一

元 揭傒斯 曼碩

制 表

金紫光祿大夫山東行尙書省兵馬都元帥知
濟南府事特封濟南公致仕贈効忠宣力佐
命功臣榮祿大夫司徒柱國追封齊國公謚
忠襄張榮加贈推忠宣力正義佐命功臣太
師開府儀同三司上柱國追封濟南王仍謚
忠襄制

朕纂承基緒每思創業之惟艱褒卹勲勞常恐推恩

之未至況山東諸侯之起皆天下良將之雄旣盡厥忠宜豐其報某官沈幾先物遺愛在人方保有齊民已知真主之受命及歸我太祖厯事累朝而致身秣馬南征則孱金亡走拔劍東指則逆□就擒握兵柄者餘四十年未嘗妄殺臨軍陣者凡數百戰動必有功故詔有張相之稱而世任元戎之寄雖列土之封猶及於懸車之日而漏泉之澤未究於蓋棺之餘況在爾孫復爲朕使或守藩維於外或司喉舌於中世篤忠貞人推謹慎是用因爾山川之履增爾勲號之崇秩旣陟于三公爵仍超於五等乃爾自致非朕敢

私於戲紫綬金章尙念初來之日丹書鐵券永膺異姓之王神其有知服此加命可

妻齊國夫人宋氏進封濟南王夫人制

昔國有東諸侯旣封于濟今朕嗣大厯服申爵以王載永齊體之賢宜與從夫之典故某官妻宋氏早以令德相其良人舉五十萬衆以歸朝厯三百餘戰而書節分茅胙土傳及子孫襲組影纓布列中外皆爾相成于警戒用能共濟于艱難是用錫爾卿封貴其爵號以篤爾後以報爾前於戲翟茀魚軒尙服異恩於永世虎頭燕頤從懷舊將於當年其迪爾家以贊

皇國可

諸王忽都答兒追封雲安王諡忠武制

昔我世祖親定雲安命九王以鎮之將百年于茲矣
乃者國家多故邊圉失宜健將驕王遂據城而稱亂
陳師鞠旅方下詔以討平粵有忠烈之臣乃在伯叔
之籍爰申褒卹以慰死生故忽都答兒沉鷙有謀剛
勇獨斷三世藩輔蔚爲磐石之宗一心朝廷不忘社
稷之計方天厯之反正而遠人之未思中慶則伯忽
要盟卽飛章而上變烏撒則僇余旣叛先率衆以抗
鋒見危而奮不顧身力戰而繼之以死報已後矣朕

甚憫焉雖析爵以列侯王何裨地下仍賜錢以給妻
子式表予哀嗚呼爲子必孝爲臣必忠旣克承于我
祖無言不酬無德不報尙永顧于爾邦魂而有知服
此休命可

諸王羅羅解追封保寧王謚昭義制

臨戰陳而思孝必有勇功於板蕩以盡忠斯無愆義
往在諸父羅羅解世鎮南詔心貫上蒼適嬰天厯之
兵獨戰羅雄之境力竭而援不至兄死而弟亦隨山
川以之興悲日月爲之動色有宗王而盡節宜諸將
之同心遂使叛亡無不殂醢非褒卹之獨後屬內外

之多虞故疇爾庸超五等而命爵載考爾行詔百世
以易名申錫綬錢以給家屬所以昭國典所以勸遠
臣噫得猛士以守四方孰如同姓明俊德以親九族
尙監異恩可

申命三十九代天師張嗣成制

朕惟老聃度函谷關未始忘于天下留侯從赤松子
豈果棄於人間式啟聖人神道設教之門遂任天子
爲民請福之寄主其法者代有功焉不遠而朝宜新
厥命翊元崇德正一教主嗣漢三十九代天師太玄
輔德體仁應道太真人主領三山符籙掌江南道教

知集賢院道教事張嗣成神明之裔道德之宗自爾
祖之遇世皇蓋有天意洎乃父之於仁廟益簡帝心
雖有道之長實係聖明之主而無爲之治庶聞清靜
之風誕播玄休屢昭靈應卿旣克承于後朕亦丕勞
爾先往者海水爲災再免黔黎於昏墊近而天時作
慝三致雨雪之感通功成弗居禮宜有報噫神仙以
忠孝爲本尙無愧于傳賢帝王以天地爲心曷敢忘
於敬德見所帶職號悉如故

進至大聖德頌表

皇帝福蔭裏江南布衣臣揭傒斯言恭惟正月七日

皇太子暨丞相百僚耆耄等以皇帝陛下出撫邊陲
入繼大統豐功盛德高出千古握符御極宜獲徽稱
卽日詣大明殿冊上尊號十有一日躬事太室獲瑞
雪之應二月十有三日詔告天下覃恩中外天人協
慶日月增華凡有性情莫不欣戴宜形歌頌以達和
氣臣僕斯誠惶誠恐頓首頓首臣聞古者聖人之詩
莫先於詩故聖主賢臣有大功顯行必載之詠歌使
天下曉然知君臣之所趨德化之所由見善而遷聞
義而上去之萬里如立其朝後之萬世如生其時所
以事神保民無右於此故有虞命夔以教之周置大

師以掌之君臣朝燕必有賦郊廟薦享必登詩書之爲道誦其辭無鈞棘叢雜之鏘聆其音有往來疏數之節玩其義有優柔沉蘊之旨其感於人也易其入於人也深乖沴之氣可變而爲祥風甘雨姦回之行可化而爲忠鯁貞良是以聖人尙之故雖反復典謨訓誥之文不若賡明良之歌康衢擊壤之謠周南召南之什下至農野婦豎一關其耳熙熙灑灑想見其治漢魏以來騷人賦客時時間作雖不能盡追古道其抒情蓄志可興可觀斯義繇繇庶幾未泯聖明之世尤所宜聞欽惟統天繼聖欽文英武大章孝皇

帝陛下道準天地德繩祖考惠澤周乎無間威稜疊乎八表舉前王未究之禮叙洪範載錫之疇孝弟足以厚黎民剛明足以制萬幾見賢如己能聞諫如己出去惡如薙草芥好善如嗜飲食允文允武赫赫巍巍宜其克集大勲君臨天下載膺顯冊彰厥大猷而耆俊如雲良士如林必有振發毫楮鋪張洪業爲一代之盛典若微臣者曾何足云然想像於丘岑畎畝之中不若覩快於輦轂之下繼漏於筐篋刀筆之末不若聲諸詠歌之間近可以風動四方遠可以流耀無窮臣自揆才薄迹微無以補益毫髮幸因羈旅獲

際盛明謹撰聖德頌一篇繕寫投進雖不足以加天地之大日月之明載之簡牘傳之天下亦可以見聖明德化之所由也臣無任瞻天樂聖激切屏營之至謹奉表以聞臣俟斯誠惶誠恐頓首頓首謹言

皇太后加尊號監脩國史府賀表

延祐二年

聖主尊親稽先朝之盛典慈闈進號備昭代之徽稱寶冊載膺瑤圖永固

中賀

欽惟儀天興聖慈仁昭懿壽

元全德泰寧福慶皇太后陛下德全坤厚功底泰寧福莫大於多祥兩開帝業慶莫隆於至養咸戴母儀式兼崇極之名益衍昌明之祚臣某等久塵台鼎叨

總圖書興聖春融幸仰陪於大禮含飴日永願丕贊
於鴻猷

天壽節監脩國史府賀表

一人有慶節肇紀於重三萬壽無疆位永乘於九五
乾坤薦祉朝野騰歡中賀欽惟皇帝陛下道大德純功
崇業廣舉賢能興學校天下文明異章服同車書海
內率俾克極尊親之孝益隆致治之基臣某等任忝
國鈞職嚴金匱蓬萊宮殿幸依日月之光河洛圖書
丕續皇王之統

元旦翰林國史院賀皇太后表 延祐三年

天子當陽八表奉夏時之愿皇闡獻歲萬年稱元日
之觴雲氣蓬萊春風宇宙中賀欽惟尊號陛下德含坤
育運啟泰亨推福慶以致崇日星顯號溥慈仁而協
治雨露羣生陰教修而母道隆孝理彰而聖功遠臣
某等欣逢盛旦忝綴周行玉署日和願播思齊之美
瑤圖天廣永居長樂之尊

天壽節代蒙古國子監賀表

延祐二年

一人受命適符上巳之辰萬歲稱觴載協壽星之紀
照臨所被慶抃惟均中賀欽惟皇帝陛下德猶日中養
以天下暨聲教於四海俗美風淳舞千羽于兩階河

清嶽晏益體乾剛之用式隆震夙之祥臣某等學守
國書班聯胄監龍顏日角仰瞻穆穆之光鶴算龜齡
俯效綿綿之祝

上再卽位奎章閣賀表

天曆二年

六龍啟運飛躍得聖人之時萬象趨新變化合太平
之應普天之下如日再中中賀欽惟皇帝陛下剛健粹
精聰明神武霜露游更而不失其正乾坤再造而不
居其功惟其有帝堯帝舜之聖仁乃能行祖甲祖庚
之揖讓慎徽五典則崇孝友以率先表章六經則進
儒雅以爲本皆天理人心之至當必明君義辟而後

知宜歷數之在躬雖同體而不易况祖宗之大統豈
違道所可求是以踐祚之初甘露卿雲諸福畢至及
夫明詔之下扶桑若木萬姓歡呼允長馭於權綱斯
永保夫社稷臣某等叨聯延閣適際清明義畫禹疇
願闡皇王之秘虞韶殷輅丕昭禮樂之隆

奎章閣賀正表

大歷三年

天人有造治隆揖讓之餘正月始和慶協發生之妙
車書萬國千羽兩階中賀欽惟皇帝陛下道接百王統
承三正達夫郊社之禮禘嘗之義敬致其嚴觀乎天
地之德日月之明益躋于聖是用格于上下莫不歸

其照臨臣某等忝職西清依光北極君臣父子永敦
天秩之常禮樂詩書誕播皇風之盛

冊皇太子奎章閣賀表

重明麗正作離咸仰於皇文一索得男出震允宜于
主器旣疏封於玄土爰正位於青宮所以繫人心所
以本天下欽惟尊號陛下敬隆郊廟德洽乾坤當春
秋鼎盛之時建宗社靈長之計惟聰明可以正百辟
俾綜樞機惟元良可以貞萬邦足副儲貳重以羣臣
之固請聿遵累聖之宏規然監國撫軍教尤資于四
輔而問安視膳禮必謹于三朝式養聖功用光帝業